

Dokter Eric Vinck di Aruba gradua como ciruhano cardiovascular

Cu beca di Aruba Scholarship Foundation y Fundacion Promocion di Conocemento Cardiovascular den Caribe

Despues cu el a termina su preparacion di home schooling study na Aruba y Corsou, Eric Vinck a cuminsa studia medicina (pre-med) na Xavier University na Aruba na januari 2007. Despues el a sigui traha na Universidad El Bosque (UEB) na Bogota, na 2009.

E tabata un estudiante briyante y ehemplar cu hopi disciplina y amor pa su estudio. Na aña 2015 Eric a gradua como Medico General. El a tuma un aña di preparacion pa continua cu un aña 'rural' pa por obtene su licencia pa practica medicina na Colombia y pa por specialisa.

El a sigui specialisa den cirugia general na 2017 na UEB, unda el a gradua na 2021 como ciruhano general. Su estudio tabata su pasion di bida. Semper Eric tabatin un



inmenso dedicacion pa su carera di medicina y Aruba Scholarship Foundation cu hopi orguyo a otorga Eric beca pa specialisa den cirugia general.

E hoben a continua su estudio na juli 2021 cu beca di Stichting ter bevordering van Cardiovasculaire kennis in het Caribisch gebied" y cu apoyo di dokter Caspar Lacle, Eric a studia un aña despues na Un-

iversidad Potificia Bolivariana na Medellin, caminda el a gradua recientemente como ciruhano cardiovascular.

Eric ainda ta eherce trabao di investigacion, tanto na Colombia como na diferente universidad na Europa, e.o. na Leiden, Maastricht y otro parti di mundo. Awor cu el a gradua como ciruhano cardiovascular, el a haya e



posicion di ciruhano di curason na Colsubsidio Clinica Cardiovascular y Clinica el Country y los Cobos Medical Center na Bogota, Colombia.

Eric a expresa cu e lo sigui busca manera pa yuda y cuida su hendenan di e islanan Hulandes, sea na Bogota of na e islanan mes. Desde mucha semper su mayornan tabata y ta apoya Eric cu su studia-

mento. Un estudio di medicina di 16 aña largo. Un abraso caluroso di felicidad pa Papa Erick y Mama Edna.

Na number di presidente di Aruba Scholarship Foundation, Frits Goedgedrag conhuntamente cu team di ASF, cu gran placer ta comparti alegria cu Eric pa cu e gran logro. Aruba Scholarship Foundation ta desea dokter Eric Vinck hopi exito cu su carera nobo como ciruhano cardiovascular.

Bon Dia Aruba tambe ta hopi orguyoso cu un yiu di tera ta yega asina leu, y ta spera cu nos por conta cu su talento y experticio na Aruba den un futuro cercano. Alabes, ta elogia e bunita trabao di ASF pa duna sosten na nos yiunan di tera pa desaroya nan talento y habilidadnan na e nivel di mas halto.

Inicio di Dia di Monumento na e monumento Casita Geel na Weststraat 15

Diadomingo 15 di september tabata Dia di Monumento y pa e ocasion special aki Minister Maduro di Cultura tabata presente na e monumento Casita Geel na Weststraat 15 pa asina duna inicio na e Open Monumenten Dag organisa pa Stichting Monumentenfonds Aruba den colaboracion cu Open Monumenten Dag di Hulanda.

Den presencia di Minister President y directora di MFA, Minister di Cultura a hiba un discurso den cual a recorda tur presente cu Monumentonan no ta solamente e edificacionan di piedra of palo, pero nan ta simbolonan di nos historia, nos retonan den pasado como pais, nos resiliencia y nos triumfonan. Nan ta e recordatorio di ken nos ta y di unda nos ta bin.

Despues di un discurso di minister di Cultura, a sigui baile di cinta, cortamento di cinta y hunto cu un hoben, Minister Maduro a habri e porta di e monumento Casita Geel pa marca inicio di e evento e Dia di Monumento/ Open Monumenten Dag habri na unda publico por admira 13 monumento den Centro di Oranjestad.



Sr. Stuart Willems cu di 30 aniversario trahando na bienestar di comunidad

E siman aki Sr. Stuart Willems a ricibi celebracion y gradicimento pa su di 30 aniversario trahando na bienestar di comunidad na Centraal Accountantsdienst.

Pa e ocasion festivo aki a entrega na Stuart su decreto gubernamental corespondiente y tambe un regalo pa recorda e aniversario importante aki di trabao.

Stuart a traha hopi aña na DIA y awo na CAD den e ramo di IT cu hopi dedicacion y profesionalismo.

